

## **VEDTEKTER FOR GRAVPLASSANE I VESTRE SLIDRE.**

Jfr. lov av 7.juni 1996 nr.32 om gravplassar, kremasjon og gravferd (gravferdsloven) §21.

Vedteke i Vestre Slidre kyrkjeleg fellestråd 12.02.98. Godkjent av kjent Hamar bispedømmeråd 13.03.98.

Justert av Kyrkjeleg fellestråd i Vestre Slidre 22.04.04. Justert av Kyrkjeleg fellestråd i Vestre Slidre 31.03.11, 24.04.14 og 13.09.16.

Endringar i følge lov og forskrifter.

### **§1 GRAVPLASSTILHØYRING**

Avlidne personar i kommunen skal som hovudregel gravleggjast på den kyrkjegarden dei soknar til, dersom dei ikkje vert gravlagde i ein annan kommune.

Dei som bur utanom kommunen kan berre få gravplass etter særskilt løyve frå fellestrådet (soknerådet) og mot å betale den avgift som til ei kvar tid er fastsett.

### **§2 FREDNINGSTID OG FESTETID**

Fredningstid for oskeurner er 20 år. Fredningstid for kister er 20 år ved Lomen, Slidre og Røn. Ved Øyjar kapell 30 år. Festetida er 5 år.

### **§3 FESTE AV GRAV**

Når kistegrav vert teke i bruk, er det høve til å feste ei grav ved sida av, og etter godkjenning frå kyrkjeleg fellestråd for ei ekstra grav i tillegg når det er bruk for det. Desse gravene utgjer då ein gravstad.

Ved bruk av urnegrav kan ein ikkje feste grav ved sida av.

Når festetida er ute, kan gravstaden festast for 5 nye år. Når det er gått 60 år etter siste gravlegging, kan festet ikkje fornyast utan særskilt samtykkje frå kyrkjeleg fellestråd.

I god tid før festetida er ute skal festaren varslast i brev. Er festet ikkje fornya innan 6 månader, fell gravstaden tilbake til kyrkjegarden. Ingen kan gravleggast i festa gravstad utan samtykkje frå festaren. Dersom

festaren sitt samtykkje ikkje kan innhentast, kan kyrkjeleg fellestråd avgjere spørsmålet om gravlegging. Festaren pliktar å melde frå om endring av adresse.

Når festaren døyrr, må arvingane verte samde om kven som skal overta festeretten. Namn og adresse til den nye festaren skal kyrkjeverja ha melding om.

### **§4 GRAV OG GRAVMINNE**

Betjeninga på gravplassen vil syte for planering og å så til grava ca.6 mnd. etter gravlegging. Gravminne kan ikkje setjast opp tidlegare enn 6 månader etter gravlegging av kiste. I mellomtida kan ein setja opp eit merke med namn til den døde.

Kyrkjeleg fellestråd skal godkjenne gravminnet og fundament før det vert sett opp på gravplassen. Fellestrådet skal ha melding om kva tid ein ynskjer å setja opp gravminnet. Det vert anvist plass for senter av gravminnet. Gravminne skal boltast etter forskrifta §24.

Festar er ansvarleg for at gravminne ikkje er i forfall, til sjenanse eller fare for dei som ferdast på kyrkjegarden. Gravminne kan leggast ned dersom det ikkje er i tråd med krav som er sett, eller er ein tryggleiksrisiko. Kyrkjeleg fellestråd er ikkje ansvarleg for skadar på graver eller gravutstyr med mindre skaden skyldas aktløyse av tilsette på gravplassen.

### **§5 PLANTEFELT**

Framfor gravminnet er det høve til å opparbeide eit plantefelt i høgde med bakken rundt. Det må ikkje vere breiare enn gravminnet, men kan i alle høve vere opp til 60 cm breitt. Det kan ikkje stikke lenger fram enn 60 cm, målt frå bakkanten av gravminnet. Det kan ikkje plantast vokstrar som er høgare enn gravminnet eller går ut over plantefeltet. Det er ikkje høve til å bruke faste dekorting, så som

liggjande plater, blomsterurner, lykter m.v. i plantefeltet. Lause dekorting skal fjernast etter bruk. Det er heller ikkje høve til å ramme inn grava eller deler av ho med hekk eller daudt materiale (steinar), men det er høve til å ramme inn plantefeltet med ein delt natursteinskant som fluktar med terrenget rundt. Dersom det ikkje er aktuelt å ha plantefelt, skal det vere grasbakke på alle sider av gravminnet. Ved fornying av gravfeste kan kyrkjeverja krevja at plantefeltet skal endrast slik at det samsvarar med gjeldande kyrkjegardsvedtekter.

#### §6 PLANTETILFANG

Plantar, kransar og liknande tilfang som vert nytta ved gravferd eller ved pynting av grav og som endar som avfall, skal vere heilt komposterbart.

#### §7 STELL AV GRAV

Den som er ansvarleg for frigrav eller er gravfestar, har rett og plikt til å stelle den grava han har ansvaret for. Plantefelt som ikkje vert tilplanta og stelt skal såast til av den ansvarlege eller av tilsette på gravplassen. Kyrkjeleg fellestråd kan syte for årleg planting og stell av grav mot betaling.

#### §8 GRAVLEGAT

Mot innbetaling av ein bestemt sum til eit gravlegat, vil kyrkjeleg fellestråd overta ansvar for planting og stell av gravstaden. Gravlegatet vert forvalta av fellestrådet sin daglege leiar som legarstyrar. Den innbetalte summen med tillegg av renter skal dekkje utgiftene til vanleg planting og stell av gravstaden i ei fastsett tid. Det skal i kvart einskild høve opprettast legatavtale. Gravlegat kan ikkje opprettast slik at det varer lenger enn den fredningstida eller festetida som ligg framføre. Dersom det oppstår slike økonomiske forhold i legattida at midlane ikkje rekk til, skal legatstyraren gje melding

om dette til den som er ansvarleg eller festaren. Det er høve til å auke legatet slik at det rekk tida ut.

Vert det ikkje auka, vil stellet av grava ta slutt når midlane er brukte opp. Dersom det er midlar att av legatet når tida er ute, kan dei brukast av kyrkjeleg fellestråd til å gjere gravplassen vakrere. Gravlegata vert forvalta i fellesskap, men legatstyraren fører rekneskap for kvart legat som vert revidert årleg. Det er høve til å rekne provisjon for administrasjon og revisjon av legatmidlane.

#### §9 BÅREROM

Kyrkjeleg fellestråd disponerer bårerom. Slike rom skal berre nyttast til å ta vare på den døde i tida fram til gravferda. Ingen har tilgjenge utan etter løyve. Liksyning kan gjerast etter samtykkje frå den som syter for gravferda og vedkjem ikkje dei tilsette.

#### §10 NÆRINGSVERKSEMD

Næringsdrivande som ynskjer å drive verksemd på gravplassane skal ha løyve frå kyrkjeleg fellestråd. Løyve kan kallast attende dersom vedkommande ikkje retter seg etter dei reglane som gjeld. Slik verksemd kan berre omfatte montering og vedlikehald av gravminne og planting og stell av graver. Tilsette på gravplassen kan ikkje engasjere seg i sal av varer eller tenester som har med gravplassen å gjere.

#### §11 RO OG ORDEN.

Freden på gravplassen må ikkje bli uroa av støy. Køyning på gravplassane må berre gå føre seg etter løyve frå kyrkjeverja. Sykling er ikkje tillatt. Hundar har ikkje tilgjenge til gravplassane.